



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Rabu, 19 April 2023

DISEDIAKAN OLEH :
UNIT KOMUNIKASI KORPORAT,
JABATAN PERKHIDMATAN VETERINAR MALAYSIA

2600 ayam percuma licin dalam sejam

MEDIA	RUANGAN	MUKA SURAT
Kosmo	Negara	16

2,600 ayam percuma licin dalam sejam

KLANG – Sebanyak 2,600 ayam bulat percuma habis diagihkan dalam tempoh sejam kepada 1,300 penduduk Kampung Sungai Udang di sini, bagi menyambut lebaran Aidilfitri.

Program bermula 9 pagi itu adalah keprihatinan ahli perniagaan dalam sektor pembinaan, Saleh Sukiman, 65, bersama keluarga dan rakan-nya dalam mengurangkan kos hidup kepada kariah yang memerlukan.

Menurut Saleh, program tahunan tersebut telah dilakukan sejak 20 tahun lalu, namun terhenti akibat pandemik Covid-19 sebelum ini.

Katanya, ia adalah lebih kepada berkongsi rezeki selain mengurangkan sedikit beban kepada penduduk menerusi barangan keperluan.

"Setiap keluarga menerima dua ekor ayam dan kita berharap sumbangan ini dapat menceriakan mereka yang memerlukan dalam menyambut ketibaan lebaran beberapa hari sahaja lagi.

"Alhamdulillah, tahun ini kami diberikan peluang untuk menyambung kembali kerja kebajikan yang tertangguh sejak



Setiap keluarga menerima dua ekor ayam dan kita berharap sumbangan ini dapat menceriakan mereka yang memerlukan dalam menyambut ketibaan lebaran beberapa hari sahaja lagi."

lebih dua tahun kerana pandemik Covid-19," katanya ketika ditemui di sini, hari ini.

Dalam pada itu, seorang penerima, Azhar Rani, 53, menzahirkan rasa syukur dengan sumbangan itu amat bermakna bagi menampung keperluan juadah pada Aidilfitri nanti.

"Berbaloi beratur untuk mendapatkan ayam hari ini. Semoga penderma diberi pahala berganda di bulan Ramadan ini.

"Sudah tentunya, bantuan ini meringankan beban kami sekeluarga dan masih ada lagi yang prihatin dengan golongan yang kurang berkemampuan," ujarnya.

Hotel kucing mula sibuk menjelang Aidilfitri

MEDIA	RUANGAN	MUKA SURAT
Utusan Malaysia	Dalam Negeri	29

Hotel kucing mula sibuk menjelang Aidilfitri

SEREMBAN: Menjelang beberapa hari tibanya Aidilfitri tidak lama lagi, pengusaha tempat penjagaan kucing ataupun 'hotel kucing' kini sibuk menerima kehadiran haiwan comel tersebut selepas pemiliknya akan pulang beraya kampung halaman masing-masing bermula pertengahan minggu ini.

Pengusaha hotel kucing KH Pets & Aquarium di sini, Norhamimah Jefri, 27, berkata, pihaknya telah mula menerima tempahan daripada pemilik-pemilik kucing tersebut sejak awal Ramadan.

"Sehingga kini, terdapat 36 ekor kucing yang bakal mendaftar masuk pada 18 April ini untuk dijaga oleh pihak kami. Sehingga kini masih ada lagi slot tempahan yang masih dibuka.

"Caj yang dikenakan untuk tempahan adalah pada harga

RM10 sehari termasuk perkhidmatan sangkar dan pasir. Pemilik hanya perlu menghantar kucing dan menyediakan makanan kucing mereka sahaja," katanya ketika ditemui *Utusan Malaysia* di Taman Warisan Puteri di sini semalam.

Norhamimah yang menjalankan perniagaan itu bersama suaminya, Mohd. Khairi Raduan, 37, itu menjelaskan, kebanyakan pelanggannya dari sekitar negeri ini malah ada juga dari Kuala Lumpur.

"Bagaimanapun pada tahun ini, saya dapati tempahan yang kami terima agak kurang berbanding tahun sebelumnya. Ini kerana saya lihat sudah ramai yang turut menjalankan perniagaan yang sama selain dan perkhidmatan pet sitter atau penjagaan kucing ke rumah-rumah," katanya.

Pemuda pukul, bakar anjing dihukum

MEDIA	RUANGAN	MUKA SURAT
Sinar Harian	Negeri	29

Pemuda pukul, bakar anjing dihukum

Hukuman tujuh kali sebatan ringan selepas mengaku bersalah sebabkan kesakitan pada anjing

Oleh ZULHISHAM ISAHAK
JOHOR BAHRU

Seorang pemuda akan menjalani hukuman tujuh kali sebatan ringan di Mahkamah Sesyen di sini pada 21 Mei ini selepas mengaku bersalah menyebabkan kesakitan ke atas seekor anjing betina pada bulan lalu.

Braden Yap Hong Seng, 19, selaku orang kena saman (OKS) dibebaskan di Mahkamah Sesyen di sini pada Selasa dengan bon jaminan berkelakuan baik selama setahun dan seorang penjamin selepas membuat pengakuan bersalah

pada 12 April lalu.

Hong Seng yang mengaku bersalah atas pertuduhan berkenaan turut dibenarkan ikat jamin sebanyak RM10,000.

Hakim Datuk Che Wan Zaidi Che Wan Ibrahim berkata, mahkamah menjatuhkan hukuman tersebut selepas menimbangkan beberapa faktor.

Jelas beliau, keputusan penghakiman tersebut dibuat selepas pihak mahkamah menimbangkan rayuan daripada pihak peguam, hujahan pihak pendakwa dan fakta kes berkenaan.

Menurutnya, keputusan tersebut juga dibuat selepas menimbangkan bahawa itu merupakan kesalahan pertama OKS selain merupakan pesalah muda serta menyatakan sudah insaf dan telah mengaku bersalah di peringkat awal pendakwaan.

"OKS juga tidak dijatuhkan hukuman penjara kerana tidak sesuai disebabkan dia masih muda dan mempunyai masa depan yang panjang. Bagaimanapun



Hong Seng (kiri) dibebaskan di Mahkamah Sesyen pada Selasa dengan bon jaminan berkelakuan baik selama setahun dan seorang penjamin.

mahkamah memandang berat akan perbuatan tidak berperikemanusiaan yang dilakukan OKS.

"Sudah menjadi tanggungjawab mahkamah untuk memberi hukuman setimpal dengan

mengambil kira faktor kepentingan awam sebagai memberi pengajaran kepada OKS dan masyarakat supaya perbuatan ini tidak berulang lagi di masa akan datang.

"Apa jua ancaman dilakukan

oleh anjing itu terhadap kamu (OKS), kamu tidak sepatutnya bertindak kejam hanya kerana sakit hati, sepatutnya kamu membuat laporan kepada agensi penguatkuasaan untuk mereka ambil tindakan.

"Setiap yang bernyawa termasuk haiwan mempunyai hak asasi untuk dilindungi dengan undang-undang dan hidup aman damai," katanya dalam penghakiman tersebut.

Pada 21 April lalu, Hong Seng mengaku bersalah Mahkamah Sesyen di sini atas pertuduhan berkenaan tetapi peguam P Rajakunaseelan yang mewakilnya ketika itu memohon penangguhan hukuman kerana peguam G K Sritharan yang sepatutnya mewakilinya tidak dapat hadir kerana berada di luar negara.

Mahkamah menetapkan 21 Mei depan untuk pelaksanaan hukuman sebatan ringan itu terhadap tertuduh secara terbuka di Mahkamah Sesyen Jenayah 4, pada jam 9 pagi.

Telur cukup, harga sayur turun

MEDIA	RUANGAN	MUKA SURAT
Sinar Harian	Negeri	28

Telur cukup, harga sayur turun

KPDN Kelantan minta orang ramai tidak khuatir kerana dapat jaminan daripada pengeluar

Oleh HAZELN LIANA
KAMARUDIN
KOTA BHARU

Kementerian Perdagangan Dalam Negeri dan Kos Sara Hidup (KPDN) Kelantan menegaskan bekalan telur mencukupi sekali gus mampu menampung keperluan menjelang sambutan Aidilfitri.

Pengarahnya, Azman Ismail berkata, jaminan tersebut diberikan oleh pengeluar yang akan memastikan bahan mentah itu sentiasa ada di pasaran.

"Selain itu, pengguna tidak perlu khuatir, harga sayur ketika ini menunjukkan penurunan.

"Penurunan itu hasil pemantauan yang dilakukan oleh pihak kami setiap hari," katanya semasa sidang akhbar pada Selasa.

Sebelum itu, beliau hadir ke program turun padang meninjau Pelaksanaan Skim Harga



Azman (kiri) bersama Hanifa (dua dari kanan) meninjau Pelaksanaan Skim Harga Maksimum Musim Perayaan (SHMMP) Hari Raya Puasa di Pasar Raya AEON, Kota Bharu pada Selasa.

Maksimum Musim Perayaan (SHMMP) Hari Raya Puasa yang dirasmikan oleh Exco Perindustrian, Perdagangan, Pelaburan dan Pembangunan Usahawan, Datuk Hanifa Ahmad.

Menurut beliau, pada masa yang sama KPDN Kelantan memberi jaminan bekalan sayur dan barangan basah lain mencukupi menjelang Aidilfitri.

Ujarnya, pengguna tidak perlu takut dan membuat pembelian panik kerana semua barangan asas ada di pasaran.

Dalam perkembangan lain, Azman memberitahu, sebanyak 212 tindakan kes telah dilaporkan dari Januari hingga April.

"Ia melibatkan pelbagai kesalahan di bawah perundangan KPDN melibatkan kesalahan menjual barangan harga terkawal melebihi harga maksimum, gagal meletakkan tanda harga berwarna merah jambu bagi barangan harga terkawal serta tidak meletakkan tanda harga pada barangan yang dipamerkan untuk jualan," ujarnya.

Jualan khas Syawal Madani catat jualan RM4.5 juta		
MEDIA	RUANGAN	MUKA SURAT
Malaysia Daily News	Online	

JUALAN KHAS SYAWAL MADANI CATAT JUALAN RM4.5 JUTA



ALOR GAJAH, 18 April (Bernama) — Jualan Khas Syawal Madani yang bermula Sabtu lepas berjaya mencatatkan RM4.5 juta nilai jualan, menurut Menteri Pertanian dan Keterjaminan Makanan Datuk Seri Mohamad Sabu.

Beliau berkata nilai tersebut adalah hasil penglibatan 1,462 usahawan di 38 lokasi bagi outlet pemasaran

Lembaga Pemasaran Pertanian Persekutuan (FAMA) seluruh negara.

“Melihat kepada perkembangan positif yang dicatat hanya dalam tempoh tiga hari ini, kita akan teruskan program sebegini pada perayaan utama lain seperti Aidiladha, Deepavali dan Krismas.

“Pada masa sama, sasaran untuk mencapai RM13 juta nilai jualan juga mampu direalisasikan dalam tempoh dua hari lagi (menjelang Syawal),” katanya kepada media pada Program Jelajah Ramadan Menteri Pertanian dan Kerterjaminan Makanan bersama usahawan Melaka di Padang Sebang di sini hari ini.

Hadir sama Timbalan Menteri Pertahanan yang juga Ahli Parlimen Alor Gajah Adly Zahari dan Pemangku Ketua Pengarah FAMA Rashid Bahri.

Beliau berkata secara keseluruhan FAMA menyasarkan nilai jualan sebanyak RM13 juta yang melibatkan 113 outlet pemasaran.

Mohamad menjelaskan pihaknya juga merancang untuk meneruskan dengan program jualan terus dari ladang dan Jualan Agro Madani dengan menyasarkan 2,000 outlet selepas Syawal ini.

Terdahulu pada majlis berkenaan, seramai 160 penerima terdiri daripada golongan asnaf dan kakitangan FAMA menerima sumbangan berupa kit makanan, di samping 40 orang anak yatim dan 20 ibu tunggal yang turut menerima sumbangan duit raya.